



STINAPA TA INFORMA

ESPESIENAN EKSOTIKO DEN KULTURA BONERIANO (Parti I)

Di 3 artíkulo tokante eliminashon di espesienan eksótiko i nan kontròl den Parke Nashonal Washington Slagbaai. Laga nos kuminsá na bisa ku si no tabatin espesienan eksótiko na Boneiru lo no tabatin ningun kultura mes, pasobra e ser humano ta un di e espesienan eksótiko riba e isla i e úniko espesie ku por krea kultura. E ser humano tin e reputashon ku e ta kapas di adaptá i sobreviví den tur medioambiente riba e planeta aki. For di e friu ekstremo na a polonan te ku e desiertonan di mas seku i kalor. Esaki ta bèrdat en prinsipio, pero kontrali na tur otro espesie ku ta "ahustá" nan fisiologia i morfologia (struktura di e kurpa) pa adaptá nan mes na otro kondishonnan, e ser humano ta trata (i logra) di kambia su medioambiente. Tur esaki sin tene kuenta ku e efektonan riba tèrmino largu. Pero esaki tabata hopi komprehensibel te ku un par di shen aña pasá, tempu ku implementashon di e kambionan aki tabata un asunto di sobreviví. E promé Bonerianonan no tabata un eksepsion riba e regla aki. Ta poko espesie por a adaptá na e medioambiente aki i floresé. E promé komunitatnan indígeno humano ku a yega Boneiru un par di mil aña pasá, a trese algun mata i bestia huntu ku nan. E meta prinsipal di e hendenan aki tabata sobrevivensia, p'esei nan no a trese mas ni kultivá mas ku nan tabatin mester di dje di dia pa dia. Komo resultado e impakto di e espesienan eksótiko riba esnan indígeno tabata insignifikante. E kolonisadónan oropeo di otro banda, ku nan set pa rikesa i gana di akumulá propiedat i desaroyo di siudatnan nobo tabatin mester di hopi mas rekurso natural ku e nativonan ku tabata habitá e isla promé. E problema prinsipal ku e espesienan eksótiko ku e Oropéanonan a bini kuné no tabata e espesienan nan mes, pero e falta di responsabilidad pa medioambiente di sernan humano den tratamentu di e espesienan aki. Tabata bandoná nan ora ku nan no tabatin mester di nan mas. Awor mester agregá ku e falta di responsabilidad aki tabata basá riba puru ignoransha i no negligensha. Awendia esaki no ta e kaso mas. Awor nos tin e informashon i e konosementu di e konsekuenshanan, pues no por skonde tras di esei mas. Den nos siguiente kolumna, lo bo siña mas di esaki. *Skirbi pa Fernando Simal, tradusí pa Marcel Nahr.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURESA



Traha huntu na un desaroyo duradero pa Boneiru